

2 TESARÓNIKA

Paoro Iokanatsopatakiti Iuaĩkana Tesarónika Auakanimoni

¹ Paoro, Síyasi, Tximótxio pakini iokanatsopata Teoso mereẽkinimoni Tesarónika sitatxitiã. Aĩri Teoso nakitiakori hĩtxaua. Apiananiri Xesosi Kristo nakitiakori hĩtxaua. ² Aĩri Teoso, Apiananiri Xesosi Kristo pakini sikai ikinipoko erekari. Ninoa kamaerekaxiniretai hĩte.

Xesosi Kanapiriini Pirena

³ Nitariakori, ätipirika atxari Teoso: “Erekapitikari pikamakiti Tesarónika auakani ĩkapani,” atxa. Ikara atoko asãpiretari Teoso, kotxi ikiniõtika Teoso sãkire hãuikini apiaãpota. Apaka hĩtiretakiniua ikiniõtika apiaãpota. ⁴ Ininiã apanakini Teoso sãkire auĩakanikata aũuakasaaki, asãpiretana ninoa ate iuikinii hĩte. Ate iuikari himisiritiko himĩteenekini. Ate iuikari hãuikiniri Teoso sãkire. Iteene himaxikiko, himisiritiko pakini, iuaritika himĩteenekari. Iteene hãuikari Teoso sãkire.

⁵ Himisiritiko himĩteenekini oerekari Teoso misiritiniri maerekati kamakani, kotxi ikara atão. Hĩte misiritaãka, kotxi hĩkamari hĩauĩte Teoso paniãtakiti, ininiãkara iuamoni apakatapitika hãuini Teoso auĩtetxi ininiãtaãua. ⁶ Teoso kamari atão inakaranoka. Ininiã imisiritariko hĩte misiritakani. ⁷ Ixipokariko hĩte misiritiko, ate misiritiko apaka. Iuasaaki hĩtomata atekata. Ikara atoko inakari ikama, Apiananiri Xesosi oerekikosaaki Teoso tixine ipotorikasaaki, initiriakori kaposotiirerinkata. ⁸ Xamina tirinakariã imisiritanako Teoso mimarotakani, aũũte Xesosi Kristo iokanapirena erekari makĩpitakani. ⁹ Ninoa misiritaãkako ätipirika. Ikinipoko xipope ninoa ĩkapani. !

Auiritaãkana Apiananiri auiniãtaã apokinina. !Atamatarina iua iotximere. !Atamatarina iposotiire. ¹⁰ Ninoa misiritaãka, Apiananiri kanapiriini õtisaaki. Iuasaaki inakitiakori, isãkire auiaãkani, txariko: “Peerekai. Peerekai. Åti kaposotiireri pite atoko inakari !auari,” itxanako. Ikara atoko hïte apaka sãpiretari iua iuasaaki, kotxi hïte auikari asãpiretakiti hïtemoni.

¹¹ Ininiã amisãkiretapikari aTeosone hïte ïkapani. Ia atoko atxari iua: “Pite akiritari Tesarónika auakani pinakitiakori ininiuana ïkapani, ininiã ninirekari pite apokaerekatiniri ninoa kamakiti pite ïkapani. Pisikaposotiiretana ninoa ikinipoko inireëkitina erekari ikaminina ïkapani. Ninoa auikari pisãkire, ininiã iparïkauatana pite ïkapani. Ininiã pisikaposotiiretana ninoa ikara iparïkana ikaminina ïkapani.” ¹² Ikara atoko amisãkiretari Teoso, kotxi apanakini atamatakasaakiri erekari hïkamakiti, itxarinako aãuïte Xesosi Kristo: “Peerekai pite,” itxanako, ininiã Xesosi uãka iuikaãka. Apaka Xesosi txaike hïte: “Peerekai hïte,” itxaiko. Ikara atoko aua, kotxi aTeosone, Apiananiri Xesosi Kristo pakini sikari ikinipoko erekari hïtemoni.

2

Apia Maerekati Apokini

¹ Nitariakori, maxinikari aãuïte Xesosi Kristo kanapiriini. Maxinikari iuakata aãpotiitiniua. Ikara axinikasaaki, aõtãkikai hïte. ² Apanakini sãpiretai: “Apiananiri kanapiriini õti apokapeka,” itxana. Maerekaxiniretika ! hïtxape. Ikara atoko inakasaakina, ! hïpïkarauatape. Paxirari ninoa sãkire. Atxiïti ninoa txari: “Erekari Mata-matakoti sãpiretano ikara.” Atxiïti ninoa txari: “Paoro sãpiretari ikara.” Atxiïti ninoa txari: “Paoro iõkat-sopatari ikara.” Paxirari ninoa sãkire. Kona hãuikapiri ikara atoko inakari. ³ Kona xatiki hãuiritapiri kãkiti

misirienetini. Apiananiri kanapiriini apisapanika, kãk-
iti !inirekari Teoso sãkire ikĩpitini. Iuasaaki maerekati
kamakari apiatakari apoka. Xipokatxi ãkiri akiritaãka.
Iua xipokaãkapitikako. ⁴ Iua apia maerekati !inirekari
Teoso paniãtakiti ikamini. Iuikauako. “Kãkiti teosone-
takini posotiire poiãoka. Nota posotiire apiata,” itxako.
Iuasaaki iitopãka Teoso misãkiretiko aikoti ãki. “Teoso-
rano nota. Notanokara Teoso txaua. ãTi Teoso !uari,”
itxako iuasaaki. ⁵ Hĩtekata nauakasaaki, nisãpiretapekai
ikara. Atxiĩti hĩte xinikapanikari nisãpiretakiti? ⁶ Uatxa
kona apakatapanika iua apia maerekati apokini. Himaro-
tari Teoso !auritari iua apokini uatxa. Iketo õtinokara
Teoso auiritari iua apokini. Iuasaaki iuaka oerekaua.
⁷ Maerekati kipatakori posotiire auape uatxa, iuaritika
maerekati mauritakati !auritapanikari iteene maerekati
iarikini. ãTi õti maerekati mauritakati makatxakaãka.
⁸ Iuasaaki iua apia maerekati oerekaua kãkitimoni. Api-
ananiri kanapiriãkasaaki, okari iua. Ixõkare, isinanire-
nani xipokari iua. Iotximere xipokari iua apia maerekati.
⁹ Iua apia maerekati apokasaaki, Satanasi posotiire aua
iuamoni. Ikamariko ikini sereti posotiiretxi kãkiti ma-
posotakiniti. Iua oerekari ikara, kãkiti imisirienetini
ĩkapani, isãkire kãkiti auikini ĩkapani. ¹⁰ Ikini sereti
maerekati ikama kãkiti pĩpinanaãkani imisirienetini ĩka-
pani. Ninoa pĩpinanaãkani xipokapitikako, kotxi !inireka-
rina atão inakari itiretinina, ininiã imaerekanina makatx-
akiko !uari. ¹¹ Ininiã iuasaaki Teoso txikitakana auikini-
rina ninoa misirienetakani sãkire, ininiã auikarina atão
minakati apiatakari. ¹² Ininiã atão inakari mauikakati
misiritaãkako, kotxi iteene ipotxitari imaerekani.

Iteene Hãuikariko Teoso Sãkire

¹³ Nitariakori, Apiananiri tirketakini, ãtipirika erekari
amisãkiretiniri Teoso hĩte ĩkapani ia atoko: “Erekapitikai,

kotxi pite mereēna Tesarónika auakani imaerekanina pi-makatzakini ĩkapani.”

Itixi kamiko apisapanika, iua mereēi hĭte. Imakatzakari himaerekani, kotxi Erekari Matamatakoti txĭkitakai Teoso nakitiakori hininiua. Imakatzakari himaerekani, kotxi hĕuikari atĕo inakari. ¹⁴ Teoso iokanapirena erekari asĕpiretakiti hĭtemoni hĕuikasaaki, iusaaki Teoso akiritai hĭte. Ininiĕ aĕuĭte Xesosi Kristo iotximere hĭte apaka apakapako. ¹⁵ Ininiĕ nitariakori, iteene kataparaxinire hĭtxako. Iteene hĕuikariko Teoso sĕkire asĕpiretakiti, aiĕkatsopatakiti pakini. !Hĭtakanapapiri.

¹⁶ Anirekari aĕuĭte Xesosi Kristo, aĭri Teoso pakini sikataparaxiniretinii hĭte. Ninoa iteene tiretaua. Ātipirika isikataparaxiniretaua. Isikaua erekari aiĕtapini ĩkapani. Aimarotari ikara erekari apokapitikako. Ikara atoko inakari ikama ate ĩkapani, kotxi isikaua ikinipoko erekari. ¹⁷ Erekari hĭsĕkiretakasaaki, erekari hĭkamakasaaki, anirekari isikataparaxiniretinii hĭte apikomoni erekari hĭkamini ĩkapani.

3

Himisĕkiretariko Teoso Ate ĩkapani

¹ Nitariakori, nisĕkire mapotĕkire apoka. Himisĕkiretariko Teoso ate ĩkapani Apiananiri sĕkire katima iaripiretini ĩkapani. Himisĕkiretariko Teoso Apiananiri sĕkire auikiko ĩkapani, hĭte auikiniri atokotxikana. ² Himisĕkiretariko Teoso imakatzakiniua ate amapinakani ĩkapani, maerekati kamakani sauaki aĕuakasaaki, kotxi apanakini !auikari Teoso sĕkire. ³ Apiananiri kamari ikinika isĕkire iaĕka. Iua sikataparaxiniretai hĭte. Itokapakeĕtai, ininiĕ Satanası !inokai. ⁴ Apiananiri txĭkitakaua ate aimarotiniri ate paniĕtakiti hĭkamini. Ate imarotari, katana apaka

hīkamapanikariko asākire iaōka. ⁵ Anirekari Apiananiri oerekinii Teoso tiraōki. Anirekari himīteenekiniri ikinika himisiritiko, Kristo imisiritiko imīteenekini atokokana.

Kākiti Paniātakiti Makīpitakani

⁶ Nitariakori, aāuīte Xesosi Kristo nireēkiti iaōka asāpiretai hīte, ininiā apaniātai ia atoko. Hītari kākiti paniātakiti makīpitakati, aōereēkiti iaōka imakamakaniā, ininiā iua moianari !hītxapeuako. Hītakanapariko iua. ⁷ Hīte imarotari akamakiti iaōka hīkamini, kotxi hītekata aāuakasaaki ate kīpitari kākiti paniātakiti. ⁸ Kona anikari nipokori amaīkitxitakinini. Iuasaaki iteene aparīkauata. Īkanōka, pokamara pakini aparīkauata akiena aiāmotini ĩkapani, kotxi !anirekari hīte kaamatini hīte kiena. ⁹ Apakatapitika kākiti ĩkitxitiniua aparīka ĩkapani, iuaritika !anirekari hiīkitxitiniua, kotxi anirekari hīte parīkauatini ate parīkauatini atokokana. ¹⁰ Hītekata ate auakasaaki, ate paniātai hīte ia atoko: “Kākiti manirekakaniāri iparīkauatini, !inikapani.”

¹¹ Ate kenakopiretari hīte sauaki auari kākiti paniātakiti makīpitakani. !Iparīkauatana. Ātipirika ipotxitarina imarotininirina āti kākiti kamakiti. ¹² Aāuīte Xesosi Kristo posotiireē, apaniātana kākiti ikara atoko inakani iparīkauatinina. Aōtākikana iparīkanoka ikaminina ĩkienana apokinina ĩkapani. !Himaākatapiri apanakini kamakiti. ¹³ Nitariakori, !hīsāpakape erekari hīkamini.

¹⁴ Kākiti ereē makamakaniāri ate ōtākikakiti ia iōkat-sopariā, erepaniko iua. Iua moianari !hītxapeuako. Hītakanapariko iua, ininiā iuasaaki atxiīti ipētauata. Iuasaaki atxiīti iuaīkana atāo ikama. ¹⁵ Imoianari !hītxapeuako, iuaritika himokaiakari !itxaua. Hīpinitariko iua, kotxi hītari itxaua.

Paoro Sākire Mapotōkire

¹⁶ Anirekari Apiananiri, kãkiti kamaerekaxiniretakari, kamaerekaxiniretinii hĩte ikiniõtika. Anirekari iua kaikotini hĩtekata.

¹⁷ Nota Paoro iõkatsopata nisãkire mapotõkire niuakoã. Ia nitakaõtixikare, ininiã himarotari atão ia nota iokantsopatakiti. Ia atoko inakari niõkatsopata. ¹⁸ Aãuĩte Xesosi Kristo sikari ikinipoko erekari hĩte hĩkinikamoni. Ameẽ.

Teoso sãkire ameneri New Testament in Apurinã (BR:apu:Apurinã)

copyright © 2004 Wycliffe Bible Translators, Inc.

Language: Apurinã

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apurinã

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21
